

## فريق التفريغ بموقع الطريق إلى الله

يقدم

من سلسلة "لا تقنطوا"

إن الحسنات يُذهبن السيئات

(باللهجة المصرية)



لفضيلة الشيخ: أحمد جلال

رابط المادة: <http://way2allah.com/khotab-item-135985.htm>

السلام عليكم ورحمة الله وبركاته

الحمد لله رب العالمين، والصلاة والسلام على أشرف المرسلين؛ سيدنا محمد، وعلى آله وصحبه ومن تبعهم بإحسان إلى يوم الدين، أما بعد؛

حتى لو أذنبت، ولو في يوم من الأيام شيطانك غلبك في جولة من الجولات، أو أنت في يوم من الأيام سمعت لكلام نفسك الأمانة بالسوء، ووقعت في ذنب، مش عايزين لا يأس ولا إحباط، وعايزين أكثر حاجة نركّز فيها دلوقتي هي العمل الصالح اللي بيكون بعد المعصية، الحسنه اللي النبي -صلى الله عليه وسلم- قال عنها: "وأَتبعِ السَّيِّئَةَ الحَسَنَةَ تَمَحُّهَا" حسنه الألباني، الحسنه اللي ربنا لما اتكلم في القرآن قال: "إِنَّ الْحَسَنَاتِ يُذْهِبْنَ السَّيِّئَاتِ" هود: ١١٤، بعد الذنب اللي أنت وقعت فيه انس تمامًا الذنب، وعايزك دلوقتي تركز في العمل الصالح اللي بيه إن شاء الله بإذن الله ربنا سبحانه وتعالى ينجيك من عاقبة الذنب ده.

عارف -لا قدر الله- لو في يوم من الأيام واحد راكب عربيته وماشي على الطريق السريع وعمل حادثه وحصل له نزيف كتير، أول حاجة ييفكروا فيها مش الدم اللي خرج منه، أول حاجة ييفكروا فيها في المستشفيات إزاي يدوله الدم، يعملوله نقل دم يعوضوا الدم اللي راح، وفي نفس الوقت بيدووا يعلقوله محاليل علشان يعوض اللي فقده من وراء الحادثه اللي عملها، هو ده اللي المفترض أي إنسان مُذنب أو أي إنسان عاصي يفكر فيه، كتير من الناس بيقعد يفكر في الدم اللي خرج منه أثناء النزيف عند الحادثه، بس ده غلط؛ لأن التفكير الصحيح دلوقتي إن أنا أشوف وأدور وأبحث عن حد فصيلة دمّه زي فصيلة دمّ المُصاب علشان نبدأ ننقله نقل دمّ، وبعد كده ندّيله المحاليل المطلوبه، وده اللي النبي -صلى الله عليه وسلم- أكد عليه في أحاديث كثيره جدًا هيبان لنا الآن قدّ إيه هي كتير.

علماء النفس وعلماء التربية فطنوا تمامًا لهذا المعنى، وقالوا لنا هو ليه النبي -صلى الله عليه وسلم- أمرنا بالعمل الصالح بعد السيئه، الإمام الغزالي إمام من الناس اللي فعلاً كان مُرتب فاضل، الإمام الغزالي فطن للمعنى ده فيقول كلام جميل جدًا في الإحياء، فيقول: "فالناظرون بنور البصائر علموا أنّ نار الندم تحرق تلك الغبرة -التي كانت على القلب على إثر الذنب-، وأنّ نور الحسنه يمحو عن وجه القلب ظلّمة السيئه، وأنه لا طاقة لظلام المعاصي مع نور الحسنات، كما أنه لا طاقة لظلام الليل مع نور النهار، كما أنه لا طاقة لكدورة الوسخ مع شدة بياض الصابون".

معاني جميلة قوي، الإمام الغزالي يقول لنا مهما كانت المعصية اللي أنت عملتها سوّدت قلبك، لا طاقة لهذه الظلمة مع نور العمل الصالح اللي انت هتعمله، ويقول لنا زَيّ بالطَّبُّب كده لَمَّا يكون عندنا ثياب مُتَسَخِّة وحطيناها في الغسّالة اتغسلت، والمسحوق اللي احنا بنستخدمه قوي، لا طاقة لكدورة الوسخ مع شدة بياض الصابون، هو كده، القلب وإنْ تغيّر في يوم من الأيام بسبب المعصية اللي وقع فيها الحسنه اللي انت هتعملها بعد كده هتكون هي السبيل إنْ انت تمحو ده تمامًا.

علشان كده برضه الإمام العالم المُربّي الفاضل شيخ الإسلام ابن تيمية -رحمه الله- كان يقول: "فالدنوب إنّما تقع إذا كانت النفس غير مُمتثلّة لِمَا أمرت به، ومع امتثال الأمور لا تفعل المحظور؛ فإنهما ضدّان". شيخ الإسلام بيدينا معنى جديد فيقول لنا إنّ فعل الطّاعة والمعصية الاتنين عكس بعض، ما بيتجمّعوش في مكان واحد أبدًا، لو إنت في يوم مع الأيام عملت معصية ووقعت المعصية دي في قلبك اعمل بعدها على طول عمَل صالح، ليه؟ لأنّ العمل الصالح ده بمجرد ما ينزل نوره للقلب بيترد تمامًا ظلّمة المعصية، وده المعنى اللي احنا لازم نكرّره كثير عند النَّاس.

ابن مسعود بيحكى لنا موقف من المواقف يقول لنا: إنّ رَجُلًا أصاب من امرأة قُبلة في الحرام، فأتى رسول الله - صلى الله عليه وسلم- فذكر ذلك له، فقال: أقم عليّ حدّ هذا الذنب، فنزل قولُ الله - سبحانه وتعالى -: "إِنَّ الْحَسَنَاتِ يُذْهِبْنَ السَّيِّئَاتِ"، فقال الرجل: ألي هذه خاصّة يا رسول الله؟ قال: لا، بل لأمتي عامّة.<sup>1</sup> أيّ حدّ هيعمل سيئة في يوم من الأيام عمل حسنة انطردت السيئة خلاص من قلبك. سيدنا أبو ذرّ -رضي الله عنه- يقول أوصاني حبيبي -صلى الله عليه وسلم- فقال لي: "اتَّقِ اللَّهَ حَيْثُ مَا كُنْتَ، وَاتَّبِعِ السَّيِّئَةَ الْحَسَنَةَ تَمَحُّهَا، وَخَالِقِ النَّاسَ بِخُلُقٍ حَسَنٍ" حسنه الألباني.

من معاني إنّ الحسنات يذهبن السيئات:

يعني إيه "إِنَّ الْحَسَنَاتِ يُذْهِبْنَ السَّيِّئَاتِ"؟ لها عدّة معاني:

- نور الحسنه يزيل سواد المعصية من القلب

المعنى الأول: إنّ الحسنات يذهبن السيئات: إنّ نور الحسنه لما ينزل في القلب بيثيل سواد المعصية اللي أنا عملتها من شوية، يعني لو في يوم من الأيام أنا نفسي راضتي على حاجة غلط على التليفون أو على الكمبيوتر، فيه سواد حصل في القلب، قوم بسرعة صلّ ركعتين واستغفر الله، تكون النتيجة ربّنا -سبحانه وتعالى- يمحو عنك الذنب اللي إنت عملته فيرجع قلبك أبيض تاني، وده اللي النبي قاله لنا إنّ العبد إذا أذنب ذنبًا نكثت له في قلبه

<sup>1</sup> عن ابن مسعود رضي الله عنه: "أَنَّ رَجُلًا أَصَابَ مِنْ امْرَأَةٍ قُبْلَةً، فَأَتَى رَسُولَ اللَّهِ صَلَّى اللَّهُ عَلَيْهِ وَسَلَّمَ فَذَكَرَ ذَلِكَ لَهُ، فَأَنْزَلَتْ عَلَيْهِ: "وَأَقِمِ الصَّلَاةَ طَرَفِي النَّهَارِ، وَزَلْفًا مِنَ اللَّيْلِ إِنَّ الْحَسَنَاتِ يُذْهِبْنَ السَّيِّئَاتِ، ذَلِكَ ذِكْرِي لِلذَّاكِرِينَ" قَالَ الرَّجُلُ: أَلَيْ هَذِهِ؟ قَالَ: لِمَنْ عَمِلَ بِهَا مِنْ أُمَّتِي" صحيح البخاري. وفي رواية: "قَالَ الرَّجُلُ: يَا رَسُولَ اللَّهِ أَلَيْ هَذَا؟ قَالَ: لَجَمِيعِ أُمَّتِي كُلِّهِمْ" صحيح البخاري.

نكتة سوداء، فإذا تاب ونزع واستغفر صقل قلبه<sup>2</sup>، السواد ده راح، فمعنى "وأَتَبَعَ السَّيِّئَةَ الْحَسَنَةَ تَمَحُّهَا" يعني تُمَحِّي هذه السيئة أولاً من على قلبك.

### - تُمَحِّي السَّيِّئَةَ مِنْ صَحِيفَةِ سَيِّئَاتِكَ

٢. تُمَحِّي هذه السيئة كمان من صحيفة سيئاتك، ما شاء الله لا قوة إلا بالله.

### - الْحَسَنَاتِ دَرْعٌ وَاقٍ مِنْ عَقُوبَاتِ الذُّنُوبِ

٣. وده معنى مهم جداً إنَّ العقوبات اللي ممكن كانت تنزل عليك بسبب العمل السييء اللي أنت عملته خلاص لَمَّا نزلت الحسنه للقلب عملت زَيِّ حاجة كده درع واقى كده يحميك من العقوبة اللي كانت ممكن تنزل بسبب المعصية، وده اللي النبي قاله لنا في حديث عقبة بن عامر -رضي الله عنه- لَمَّا قال: "إِنْ مَثَلَ الَّذِي يَعْمَلُ السَّيِّئَاتِ، ثُمَّ يَعْمَلُ الْحَسَنَاتِ: كَمَثَلِ رَجُلٍ كَانَتْ عَلَيْهِ دِرْعٌ صَيِّقَةٌ قَدْ خَنَقَتْهُ..". درع، لايس اللي هو القميص الحديد ده، قد خنقته لأنه ضيق عليه قوي، "ثم عمل حسنة فانفكت حلقة..". بدأ الدرع يوسع شوية، "ثم عمل أخرى فانفكت حلقة..". عمل حسنة تانية انفكت حلقة والثالثة والرابعة والخامسة، فكانت النتيجة بقت واسعة جداً حتى خرجت للأرض، "ثم عمل أخرى فانفكت حلقة أخرى، حتى تخرج إلى الأرض" صححه الألباني.

الإمام الطيبي يقول لنا ده معنى حقيقة يعني إيه الحسنات يذهبن السيئات، يقول: "والمقصود من الحديث أن من عمل السيئات يضيق صدر عاملها -اللي هو عمل المعصية- ويحير في أمره، ويتعسر عليه فلا تيسر له الأمور، ويسود قلبه، ويضيق عليه في رزقه، ويبغضه الناس، أما إذا عمل الحسنات زالت سيئاته، فانشرح صدره، وتوسع رزقه، وطاب قلبه، وتيسر له أمره، وصار محبوباً في قلوب الخلق".

علشان كده كان النبي دايمًا لما بيوصي ناس كان بيوصيهم بالمعنى ده، حديث معاذ بن جبل لَمَّا النبي أرسله إلى اليمن، قال: يا رسول الله، أوصني، قال: "اعبد الله ولا تشرك به شيئاً" قُلْتُ: يا رسول الله، زدني، قال: "إذا أسأت فأحسن" حسنه الألباني. لو في يوم من الأيام أسأت أحسن.

نفس المعنى ده اللي قاله النبي -صلى الله عليه وسلم- لصحابي كريم جاي بيقول له: يا رسول الله، رأيت من عمل الذنوب كلها ولم يترك منها شيئاً صغيراً ولا كبيراً هل تُكفِّر عني؟ قال: تعمل الحسنات، وتترك السيئات، يجعل الله سيئاتك كلها حسنات<sup>3</sup>.

<sup>2</sup> "إِنَّ الْمُؤْمِنَ إِذَا أُذْنِبَ كَانَتْ نُكْتَةٌ سَوْدَاءَ فِي قَلْبِهِ، فَإِنْ تَابَ وَنَزَعَ وَاسْتَغْفَرَ، صُقِلَ قَلْبُهُ..". رواه ابن ماجه، وحسنه الألباني.

<sup>3</sup> "أرأيت من عمل الذنوب كلها ولم يترك منها شيئاً وهو في ذلك لم يترك حاجة ولا داجة إلا أتاه، فهل لذلك من توبة؟ قال: فهل أسلمت؟ قال: أما أنا فأشهد أن لا إله إلا الله، وأنت رسول الله، قال: تفعل الخيرات، وتترك السيئات، فيجعلن الله لك خيرات كلهن، قال وغدرتني وفجراتي؟ قال: نعم، قال: الله أكبر، فما زال يكبر حتى توارى" صححه الألباني.

هو ده المعنى المهم جداً، يبقى ليه النبي -صلى الله عليه وسلم- بيأكد علينا دائماً في أحاديثه احنا بعد لو في يوم من الأيام زلت رجلينا ماتنشلغلش تماماً بالسيئة، ولكن اشغل بالك بالحسنة اللي أنت تعملها؟ لأن الحسنة بعد السيئة سبب إن ربنا -سبحانه وتعالى- يغفرها لك، ويبدلها لك حسنات. إن الحسنة بعد السيئة سبب لرفع عقوبة الذنب على العبد. إن الحسنة بعد السيئة ترفع ظلمة المعصية من القلب وينزل مكانها النور.

### - الحسنة بعد السيئة من الأمور المعينة للإنسان على ترك المعصية

أمر رابع مهم قوي قوي إن الحسنة بعد السيئة من الأمور المعينة للإنسان على ترك المعصية، يعني أنا بعد ما باخد الحسنة وبعملها بتكون النتيجة إن أنا ده بيقوي قلبي إن أنا أترك المعصية، علشان كده كان في دعاء النبي -صلى الله عليه وسلم- كان يقول: "وَارْزُقْنِي مِنْ طَاعَتِكَ مَا تَحُولُ بِهِ بَيْنِي وَبَيْنَ مَعْصِيَتِكَ"<sup>4</sup> يا رب ارزقني من طاعتك ما تحول به بيني وبين معصيتك. وكان علي بن الحسن السلمي -رحمه الله- يقول: "سارع في الخيرات بعد ذنب تُصِيبُه يحول الله بينك وبين معصيتك".

سارع في الخيرات بعد المعصية تكون النتيجة إن ربنا -سبحانه وتعالى- يحول بينك وبين المعصية، خلاص.

### ما هي أفضل الحسنات الماحية للذنوب؟

حدّ ممكن يسألني سؤال: طب وإيه أفضل الحسنات اللي ممكن في يوم من الأيام نعملها علشان ربنا -سبحانه وتعالى- يرفع عني خطورة الذنب أو عقوبة الذنب أو السواد اللي نزل في القلب -في قلبي- بسبب الذنب؟ إجابة السؤال ده فيه إجابتين؛ فيه إجابة مختصرة، وإجابة مُفصّلة شوية:

الإجابة المختصرة ذكرها شيخ الإسلام ابن تيمية في مجموع الفتاوى لما قال: "وينبغي أن تكون الحسنات من جنس السيئات فإنه أبلغ في المحو"، يعني أنا قعدت دلوقتي أقول كلام مش كويس، الحسنة علشان ربنا يمحو عني الكلام اللي مش كويس اللي أنا قلته الحسنة اللي تزيل ده إن لسانى ده يقرأ قرآن، يذكر ربنا، في يوم من الأيام مديت إيدياً ضربت حدّ الحسنة الماحية إن الإيد دي تروح تساعد فقير أو مسكين أو محتاج.

أمّا التفصيل فالإمام الغزالي -رحمه الله- كان يفصّل لنا فيقول: "فالحسنات المُكفّرة للسيئات إمّا بالقلب وإمّا باللسان وإمّا بالجوارح -اسمعوا اللي جاية دي- ولتكن الحسنة في محل السيئة وفيما يتعلق بأسبابها..". يعني أنا عصيت ربنا في أوضتي أطع ربنا في أوضتك، في أوضتي أنا عملت معصية كبيرة في أوضتك صلّ قيام ليل واقراً قرآن واستغفر ربنا، مش كده ويس وأسبابها كمان، أنا عملت المعصية بإيه؟ بلساني؟ بإيدي؟ برجلي؟ ابدأ اعمل طاعات من جنس المعصية اللي أنت عملتها قال: ".. أما القلب -القلب اللي اتملى بغضاء وعداوة وحسد وغير ذلك- فيكفره التضرع إلى الله تعالى في سؤال المغفرة والعفو والتذلل وأن يضمّر في قلبه الخيرات للمسلمين

<sup>4</sup> .. كَانَ النَّبِيُّ صَلَّى اللَّهُ عَلَيْهِ وَآلِهِ وَسَلَّمَ يُدْعُو بِهِنَّ: اللَّهُمَّ.. ارْزُقْنِي مِنْ طَاعَتِكَ مَا يَحُولُ بَيْنِي وَبَيْنَ مَعْصِيَتِكَ.. المعجم الصغير للطبراني.

والعزم على الطاعات، وأما اللسان -اللي اغتاب ونم وكذب وشهد شهادة زور- وأما اللسان فبالاعتراف بالظلم وبالاستغفار يقول ربي ظلمت نفسي وعملت سوءاً فاغفر لي ذنوبي، وكذلك يُكثر من ضروب الاستغفار، وأما الجوارح فبالطاعات والصدقات وأنواع العبادات والطاعات"، كده ربنا يمحو عني ما قد كان.

اللي أنا عايز أوصله أمر مهم جداً إن أنا محتاج بالفعل إن أيّ معصية أنا في يوم من الأيام عملتها في نفس مكانها أنا هعمل طاعة، وينفس الجارحة اللي عصت ربنا أنا هعمل طاعة جديدة علشان ربنا -سبحانه وتعالى- يكرمني ويوقّني، سبحان الله وده اللي النبي -صلى الله عليه وسلم- قاله.

إذا عصيت سرّاً فأطع الله سرّاً وإن عصيت جهراً فأطع الله جهراً.

### الخاتمة

إوعى في يوم من الأيام تعصي تفكّر في الذنب، لا لا فكّر في الطاعة اللي هتعملها بعد الذنب، وأنا أبلغك بشري رسول الله -صلى الله عليه وسلم- الذي قال: "وَأَتَّبِعِ السَّيِّئَةَ الْحَسَنَةَ تَمَحُّهَا".

فاللهم أعنا على طاعتك، اللهم أعنا على الصلاة والذكر والشكر، وأعنا يا ربّ على الصدقات وفعل المعروف وصنائع الخيرات، حتى تكون هذه الأعمال سبباً في تكفير ما صنعنا من سيئاتٍ وذنوبٍ في وقت الخلوات.

هذا وصلّى الله على نبيّنا محمد وآله وصحبه وسلم.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>